

# Efesios

## Efeso cjenare ojoa ohoahye Pablo

**1** <sup>1</sup>Yũhũ Pablo mũsare Efeso wame tiri maca cjanare ojoa ohoaja. Yũhũ Jesucristo yere buhe duti tiquiro cũrigũ ijiaja. Cohãcjũ tiquiro cahmeno sahata Jesu yũhũre tiquiro yere buheacjare cũri. Sa yegũ mũsare Jesucristore sa wacũ tutuaducunare ojoa ohoaja yũhũ. <sup>2</sup>Sa yegũ Cohãcjũ mari Pacũ mehna, mari puhtoro Jesucristo mehna mũsare quehnoa dutiaja. Tiquina yedohoye mehna quehnoano ijiya mũsa.

### Cristo yequina mari ijigũ ihñano Cohãcjũ quehnoano yere marine

<sup>3</sup>Cohãcjũ, mari puhtoro Jesucristo Pacũro marine quehnoano yeducure. Ijipihtye tiquiro ye uhmũse cjẽ quehnoañe mehna tiquiro marine quehnoano yeducure. Marine tiquirore quehnoano wacũ tutuagũ yeducure. Cristo yequina mari ijigũ ihñano sa marine quehnoano yeducure. Tiquiro sa yeriquiro ijigũ ihñana quehnoano ño peoye mehna tiquirore quehnoano yahuducuuhna. <sup>4</sup>Ohõ saha yeahye tiquiro marine tiquiro yequinare: Ahri yehpa ijiato pano tiquiro yequina ijianajare bese tuhasahye tiquiro marine. Sa beseahye marine ñañe mariena mari ijiatire. Sa yena ñañe mariena ijiaja mari, tiquiro ihñagũ. Sa yero marine “Ñana ijire mũsa”, nisi tiquiro. <sup>5</sup>Marine cahĩno, paja ihñano panopũ ohõ saha niahye tiquiro marine: “Yũhũ macũ Cristo yedohoro mehna tiquina yũhũ pohna ijjeta”, ni cũahye marine panopũ. Tiquiro cahmediro sahata sa yeahye tiquiro marine. <sup>6</sup>Marine tiquiro sa quehnoano yegũ ihñana ño peoye mehna tiquirore quehnoano yahuducuuhna. Tiquiro macũno tiquiro cahĩniquiro yequina mari ijigũ ihñano quehnoano yere marine. Sa yena tiquirore quehnoano yahuducuuhna.

<sup>7-8</sup>Cristota ijire marine pecapũ wahaborinare yũhdũoriquiro. Mari ñañe yerire tiquiro cohãgũ ihñano, Cohãcjũ pehe mari ñañene bore. Cristo mari ñañe buhirire yariaro tiquiro diire cohãhye. Marine tutuaro cahĩno, marine paja ihñano sa ye dutiahye Cohãcjũ. Tiquiro masi pehoye mehna sa ye dutiahye tiquiro. <sup>9-10</sup>Sa yero marine tiquiro yeatire marine masigũ yeri. Panopũ apequinare tire masigũ yerahye tiquiro. Ohõ saha ijire marine tiquiro yeati: Tiquiro cahmediro sahata tiquiro tũhoturiro sahata ijipihtyequinare ihcã curuata Cristo yequina ijigũ yerota. Sa yero ijipihtiyere tiquiro ye ijigũ yerota.

Tiquiro queori pje ijigũ ñhmũse cjẽnare, ahri yehpa cjẽna gũhũre, ihcã curuata tiquiro yequina ijigũ yerota. Sa yero ñhmũse cjẽne, ahri yehpa cjẽ gũhũre tiquiro ye ijigũ yerota. Sa yero Cristo pehe ijipihtiyequina puhtoro ijirota. Sa ye ijipihtiye tiquiro ye dihita ijirota. Sa ijiatiquiro iji dutiahye Cohãcjũ tiquirore.

<sup>11</sup> Sa yero Cristo yequina mari ijiatire masino panopũ Cohãcjũ marine bese tuhasahye tiquiro yequina mari ijiatire. Ahri ijipihtiyere cũahye tiquiro tuhoturiro sahata, tiquiro cahmediro sahata yero taro. <sup>12</sup> Sa yeahye tiquiro yere mari yeatire. Mari sa yegũ ihñañe apequina tiquirore ño peoye, “Tutuagũ ijire mũhũ”, nine. Ušã pehe judio masa Jesure cahme dũcarina ijina tiquirore wacũ tutua mũhtarina ijii. <sup>13</sup> Mũsa gũhũ poto yahuducuyereeta quehnoañe buheyere tuhori. Ti buheye mehnata Cohãcjũ cahapũ wahanata mũsa. Tire tuhona tiquirore wacũ tutuari mũsa. Sa wacũ tutuana tiquiro yequina wahari mũsa. Tiquiro yequinare ohõ saha niahye Cristo: “Mũsare Espĩritu Santore ohoutja”, ni yahu cũahye. Sa yero tiquirore mũsa wacũ tutuagũ ihñano Espĩritu Santore ohori mũsare. Sa yero Espĩritu Santo mũsa mehna ijiro Cohãcjũ yequina mũsa ijije tiyere masigũ yere tiquiro pehe. <sup>14</sup> Cohãcjũ marine yũhdũgũ yere. Sa yero came tiquiro cahapũ neanota marine. Marine tiquiro neato pano Espĩritu Santo pehe Cohãcjũ yere mari cũoatire masigũ yere marine. Cohãcjũ marine tiquiro sa yegũ ihñana tiquirore ño peoye mehna “Quehnoagũ ijire mũhũ”, niaja mari.

### Pablo Cohãcjũre sini basahye Jesu yequinare

<sup>15-16</sup> Cristore mũsa wacũ tutuana ijigũ ihñagũ Cohãcjũre sa sini basaducuaaja mũsare. Jesucristore mũsa wacũ tutuarire, ijipihtiyequina tiquiro yequinare mũsa cahĩdire tuhogu Cohãcjũre “Quehnoare”, niaja. Ohõ saha tiquirore sini basaja mũsare: <sup>17</sup> Cohãcjũ ñhmũse cjũno tiquiro yere mũsa quehnoano masiatire sini basaja. Sa yegũ tiquirore mũsa quehnoano masiatire sini basaja mũsare. Tiquiro mari puhtoro Jesucristo Pacũro ijire. <sup>18</sup> Sa yegũ mũsa quehnoano masiatire mũsare sini basaja Cohãcjũre. Tiquiro mũsare yũhdũoro, tiquiro yequina ijigũ yeri mũsare. Tiquiro sa yegũ quehnoa yũhdũare marine. Tire mũsa masiatire sini basaja mũsare Cohãcjũre. Sa yegũ marine tiquiro ohoatire quehnoa yũhdũye ti ijigũ gũhũre mũsa masiatire sini basaja. <sup>19</sup> Ohõ saha mũsa masiatire sini basaja mũsare Cohãcjũre. Cohãcjũre wacũ tutuana mari ijigũ ihñano tiquiro tutuaye mehna marine yedohore. Tutua yũhdũariquiro ijire. Ti gũhũre mũsa masiatire sini basaja Cohãcjũre. <sup>20</sup> Ti tiquiro tutuaye mehna tiquiro Cristo yariariquirore masoahye. Sa yero ñhmũsepũ tiquiro poto pehepũ Cristore dũjigũ yeahye Cohãcjũ, ijipihtiyequinare tiquiro dutiato saha. <sup>21</sup> Topũ dũjuro ijipihtiyequina ñhmũse cjẽna puhtoa bui, ijipihtiyequina apequina bui ijire Cristo. Sa yero yojopũre ijipihtiyequina ahri deco cjẽna bui puhtoro ijire. Camepũ ijipihtiyequina ape deco cjẽnapũ gũhũre tiquina bui puhtoro ijiatiquirota ijire tiquiro. <sup>22</sup> Sa yero ijipihtiyequina bui cũahye Cohãcjũ Cristore. Sa yero ijipihtiyere cũoriquiro yeahye tiquirore. Sa yero Cristo yequina ihcã curua ijijequina bui puhtoro sũahye tiquirore. Tiquina dapu ijire tiquiro pehe. <sup>23</sup> Cristo yequina ihcã

curuata ijina, tiqiro pagu yero saha ijiaja. Cristo ijiphtiropu sa ijiducure. Sa yero ijiphtiyi tiqiro bajumehnedi mehna sa ijiducure.

### **Cohãcjũ marine cahĩno, paja ihñano yũhdũoahye marine**

**2** <sup>1</sup>Ñãne buhiri tina, pecapu butiborina musa ijiepegũta Cohãcjũ musare yũhdũori. <sup>2</sup>Panopure ahri yehpa cjẽna Cohãcjũre yũhdũucayequina yero saha yemedi musa. Sa yena watĩno tiqiro nidiro saha yemedi musa. Tiqiro watĩno ahri yehpapu dutiriquiro Cohãcjũre yũhdũucayequina puhtoro ijire. <sup>3</sup>Panopure ijiphtina mari ohõ saha dihita yerina ijimi. Mari ñãne dihitarẽ tutuaro cahmemi. Mari esa tuharo, mari tuhoturiro saha yemi. Sa yena ijina ijiphtiyequina apequina yero saha, mari gũhu ñana ijimi. Mari sa yena ijigũ ihñano Cohãcjũ mari mehna usuaro, buhiri dahre duamahye. <sup>4</sup>Sa ye duariquiro ijieperota marine tutuaro paja ihñano, quehnoano cahĩdi marine. <sup>5</sup>Sa cahĩ yũhdũaro, mari ñãne buhiri pecapu butiborina mari ijiepegũta marine tiqiro mehna sa ijiducuanaja ijigũ yeri. Cristo yequina mari ijigũ ihñano marine sa yeri. Marine paja ihñano, yũhdũori tiqiro marine. <sup>6</sup>Sa yero Cristo yequina mari ijigũ ihñano Cohãcjũ marine came tiqiro masoatinare cũri. Cristo tiqiro masoatinare cũri marine. Sa yena tiqiro mehna masa mũjanata mari. Sa yero uhmusepu marine Cristo mehna ijigũ yerota Cohãcjũ. <sup>7</sup>Ohõ saha yeri marine tiqiro paja ihñarire, cameru ijiatiquinare masigũ yero taro. Sa yeri tiqiro tutuaro cahĩnene tiquinare masigu yero taro. Cristo yequina mari ijigũ ihñano sa yũhdũori tiqiro marine.

<sup>8</sup>Cristore mari wacũ tutuagũ ihñano Cohãcjũ marine pecapu wahaborinare yũhdũori. Marine paja ihñano, marine cahĩno marine yũhdũori. Mari esa tuharo mari quehnoano yeye mehna Cohãcjũ cahapu waha masiedaja mari. Cohãcjũ pehe marine yũhdũore. Sa yero tiqiro mehna mari sa ijiducuatire ohore marine. Tiqiro sa ohogũ mari esa tuharo quehnoañene mari yeri wapa ijierare ti. <sup>9</sup>“Ušã esa tuharo pecapu wahaborina yũhdũu’, niboaga”, nino ohõ saha dutiahye tiqiro: Mari esa tuharo yũhdũ dutierare marine. <sup>10</sup>Cristo yequina ijigũ yeri marine Cohãcjũ pehe quehnoañene dihitarẽ yeanaja mari ijiatire. Panopu quehnoañene mari yeatire cũ tuhasahye tiqiro marine.

### **Cristore cũona mari quehnoano ijiaja**

<sup>11</sup>Sa yena panopu musa ijie tirire yojopu gũhure wacũña musa. Cristo yequina ijieranina judio masa ijiena ijina musa acaye yero saha yerina ijimedi musa. Cuhncunũ cahserogãre yũhre nedari musa. Musa sa yũhre nedagũ ihñana usã judio masa pehe cuhncunũ cahserogãre yũhre nena pehe musare ihña tuhtina ohõ saha nie tii. “Cuhncunũ cahserogãre yũhre neeñequina ijiye, Cohãcjũ yequina ijierare”, nie tii musare. <sup>12</sup>Ti pjere Cristo yequina ijierari jimedi musa. Ušã judio masa pehe Cohãcjũ beserina ijie tii. Ušã sa ijigũ “Musare yũhdũoutja”, ni cũahye Cohãcjũ usãre. Sa yena musa pehe tiqiro sa ni cũrina ijierari jimedi. Sa ye Cohãcjũ beseriquinare ihña

tuhtina ijinimedi mûsa. Mûsa ñañe buhirire pecapû wahanaja ijiri jimedi mûsa. Cohâcjû mariena ijina pecapû waha, butiborina ijie tiri jimedi mûsa.

<sup>13</sup>Yojoꝛpû pehere Cristo Jesu yequina ijire mûsa. Panopû Cohâcjûre ihña tuhtirina ijiepenata, yojoꝛpûre tiqiuo yequina ijire mûsa. Cristo mûsa ñañe buhiri curusapû tiqiuo dii cohâri bato Cohâcjû yequina ijigû yeri mûsare. <sup>14</sup>Ûsâre judio masare ihña tuhtina mûsa ijigû ihñano Cristo marine ihña tuhti dutierari. Masare sa ni yahuriquiro ijire tiqiuo. Ûsâ judio masa, judio masa ijiena mehna pûa curua mari ijigû ihñano, tiqiuo ihcâ curuata ijigû yeri marine. Mari cahme ihña tuhtirire duhugû yeri tiqiuo. <sup>15-16</sup>Ohõ saha tire yeri tiqiuo: Mari ñañe buhirire curusapû yariaro marine pecapû wahaborinare yûhduori. Sa yûhduoro tiqiuo yequina ijigû yeri marine. Sa yero pûa curua mari ijiepegûta ihcâ curuata wahma curua ijigû yeri marine. Sa yero panopû mari cahme ihña tuhtirina mari ijiepegûta marine ihña tuhtieragû yeri. Sa yero judio masa Ûsâ dutiyere cohâri tiqiuo. Ti dutiye marine pûa curua iji dutiri jimedi. Yojoꝛpûre ihcâ curuata ijiaja mari. Sa yero Cristo Cohâcjû yequina ijigû yeri marine.

<sup>17</sup>Sa yero marine cahme ihña tuhtieragû yero taro Cristo quehnoañe buheyere yahuro ahtahye. Mûsa judio masa ijiena Cohâcjû yere cwoerari jimedi. Mûsa sa cwoceragû ihñano mûsare yahuro ahtahye. Ûsâ judio masa pehe Cohâcjû yere cwou. Ûsâ gûhûre yahuro ahtahye. Sa yero ijipihtinare marine cahme ihña tuhtieragû yero, bosaro ahtahye tiqiuo. <sup>18</sup>Yojoꝛpûre ijipihtina mari judio masa, judio masa ijiena gûhû mari Pacû mehna quehnoano iji masiaja mari. Espîritu Santo tiqiuo yedohoye mehna mari Pacû mehna quehnoano iji masiaja mari. Cristo pehe marine sa ijigû yeri.

<sup>19</sup>Sa yena yojoꝛpûre ape dihta cjêna yero saha ijierare mûsa. Yojoꝛpûre Cohâcjû yequinare ihña tuhtina ijierare mûsa. Cohâcjû yequina mehna cjâna ijire mûsa. Tiquiro ya curua cjâna ijire mûsa. <sup>20</sup>Cohâcjû yere yahu muhtariquina panopû cjêna tiqiuo ye yahuducuyere oja, mûsare yahue tiahye. Ûsâ gûhû tiqiuo yere yahu dutiro tiqiuo cûrina gûhû Cristo yere yahue tii mûsare. Ûsâ ijipihtina sa yahugû tuhona, Cristore wacû tutua ducari mûsa. Quehnoa yûhduariquiro, ñañe marieniquiro ijero, tiqiuo yequina ijigû yeri tiqiuo mûsare. Tiquiro mariedagû mari ne yûhdueraboya. <sup>21</sup>Sa yero tiqiuo masiñe mehna marine tiqiuo yequinare ihcâ curua ijigû yeri tiqiuo. Sa yena tiqiuo masiñe mehna quehnoana wahaja mari. Mari sa ijigû ihñano, tiqiuo mari mehna ijire. <sup>22</sup>Sa yena Cristo yequina ijina ijipihtiyequina apequina tiqiuo yequina mehna ihcâ curua wahari mûsa gûhû. Mûsa sa wahagû Cohâcjû yaquiro Espîritu Santo mûsa mehna ijero nine.

### Judio masa ijieyequinare quehnoañe buheyere yahuriquiro ijiahye Pablo

**3** <sup>1</sup>Sa yegû yûhû Pablo, Cristo Jesu yere mûsare ijipihtina judio masa ijienare yûhû yahuri buhiri peresupû ijiaja yûhû. <sup>2</sup>Cohâcjû yûhûre paja ihñano, yûhûre cahîno, quehnoañe buheyere mûsare judio masa ijienare yûhûre yahu dutiro, cûri. Tire tuhõ tuhasari mûsa. <sup>3</sup>Panopû mûsare tiqiuo yahuerarire Cohâcjû yojoꝛpûre yûhûre masigû yeri. Ahrire mehenogâ yahu, mûsare oja tuhasau.

4Yũhu sa ojoarire buhena Cristo yere yũhũre tiquiro masigũ yerire masinata mũsa. 5Ti tiquiro yahurire panopũ cjẽnare tiquiro yahuerahye. Yojoũpũ pehere usãre Jesu cũrinare, Cohãcjũ yere yahu mũhtariquina gũhũre tiquiro yahurire masigũ yeri Cohãcjũ. Tiquiro yaquiro Espĩritu Santo pehe usãre masigũ ye basari tiquirore. 6Ohõ saha ijire tiquiro yahuri: Usã judio masa dihitare Cohãcjũ yũhdũorare. Judio masa ijieyequina gũhũre yũhdũorota tiquiro. Quehnoañe buheyere tiquina quehnoano tũhogũ yũhdũorota tiquiro tiquinare. Sa yena usã judio masa, mũsa judio masa ijiena mehna ihcã pagũ yero saha ihcã curuata ijiaja mari. Sa yena mari ijipihina Cristo Jesu yequina ijina ihcãno saha Cohãcjũ “Mũsare yũhdũoutja”, tiquiro ni cũriro sahata tiquiro yũhdũonohrina ijiaja mari.

7Cohãcjũ yũhũre paja ihũnano, yũhũre cahĩno ahri quehnoañe buheyere yahuacjũre yũhũre cũri. Tiquiro masiñe mehna sa cũri yũhũre tiquiro. 8-10Ijipihitiyequina apequina Jesu yequina docapũ ijieyequina tiquina docapũ waro ijiaja yũhu. Yũhu sa ijiepegũta judio masa ijieyequinare quehnoañe buheyere yahuacjũre cũri Cohãcjũ yũhũre. Ti buheye Cristo quehnoa yũhdũariquiro tiquiro ijiyere, quehnoa yũhdũye tiquiro cũoyere tiquiro ohoatire yahure marine. Yũhũre sa cũno Cohãcjũ “Ohõ saha yũhdũoutja masare pecapũ wahaboriquinare”, nino tiquiro yũhdũoatire quehnoano yahu pehoacjũre cũri tiquiro yũhũre. Sa yero panopũ cjẽnare ti buheyere ne yahu pehoeraniahye Cohãcjũ. Ijipihitiyere bajumehnediquiro ijire tiquiro. Yojoũpũre quehnoañe buheyere yahu dutiro cũri tiquiro yũhũre, tiquiro quehnoano masi pehoyere masigũ yero taro. Masi pehoriquiro tiquiro ijieye tiyere uhmũse cjẽna dutiyequinare, angele pũthoa gũhũre masigũ ye duahye tiquiro. Sa yero taro quehnoañe buheyere buhe dutiri marine Jesu yequinare. Mũsare judio masa ijienare yahu dutiri yũhũre.

11Ahri yehpa ijiaato panopũta “Masare pecapũ wahaboriquinare yũhdũoutja” niahye Cohãcjũ. Sa nidiquiro ijiro yojoũpũre mari pũthoro Cristo Jesu tiquiro yariaro mehna tiquiro nidiro sahata marine yũhdũori Cohãcjũ. 12Tiquiro sa yũhdũogũ yojoũpũre Cristore wacũ tutuana tiquiro yequina wahaja mari. Tiquiro yequina ijina cuero marieno Cohãcjũ mehna yahuducu masiaja mari. 13Quehnoañe buheyere mũsare yũhu buheri buhiri yojoũpũre peresupũ ijigũ yũhu ñano yũhdũgũ ihũana bũjũa witieracãhũa. Quehnoañe buheyere yũhu yahugũ tũhona Cohãcjũ yequina wahari mũsa. Yũhu sa yeri buhiri peresupũ ijiaja. Sa yegũ mũsa ye ijiatire ñano yũhdũgu niaja. Sa yena bucueya mũsa. Tire tutuaro bucue dutiaja mũsare.

### Cristo masare tutuaro cahĩne

14Sa yegũ ahri ijipihitiye mari Pacũ tiquiro yerire wacũgũ tiquiro pote dũsepe curi mehna quehe sagũ sini basaja mũsare. 15Tiquiro ijipihitiye cururi cjẽna, tiquiro yequina uhmũsepu ijieyequina, ahri yehpapũ ijiniñequina gũhũ tiquina Pacũro ijire. Ijipihina mari Pacũ ijire tiquiro. 16Tiquirore ohõ saha ni sini basaja mũsare: Tiquiro masi pehoriquiro ijire. Tutua yũhdũariquiro

ijire. Sa yero tiquiro masiñe mehna musare quehnoano tiquiro wacū tutuagū yeatire sini basaja. Espiritu Santo yedohoro mehna sa yerota.

<sup>17</sup>Sa yegu Cristore musa wacū tutua nemoatire tiquiro musa mehna tiquiro quehnoano ijiatire sini basaja musare. Sa yegu apequinare quehnoano cahña musa ijigū, Cristo tiquiro tutuaro cahñene musa masiatire sini basaja musare. <sup>18-19</sup>Ijipihtiyequina apequina Cohācjū yequina gūhū Cristo tiquiro tutuaro cahñene tiquina masiatire sini basaja. Tiquiro ijipihtiyequina masare cahī yūhduariquiro ijire. Sa cahñiquiro tiquiro ijiye tiyere musa quehnoano masiatire sini basaja musare. Sa yegu tiquiro cahñene musa masigū cahmeaja musa mehna Cohācjū quehnoano ijiatire. Quehnoa yūhduariquiro, ñañe marieniquiro tiquiro ijiro saha musa wahatire tiquiro cahñene musa masigū cahmeaja. Sa yegu tiquiro cahñene musa masiatire sini basaja musare Cohācjūre.

<sup>20</sup>Sa ye Cohācjūre ño peoye mehna “Tiquiro tutuariquiro ijire”, niñhna mari. Tiquiro masiñe mehna quehnoañe pehere comesa masine tiquiro marine. Marine quehnoana ijigū ye masine. Mari sinidi yūhdūoro ye masine tiquiro. Mari cahmeñene mari tuhoturi yūhdūoro ye masine tiquiro. <sup>21</sup>Cristo Jesu yequina mari ijigū ihñañe, Cristo ijiye tiye gūhūre ihñañe, ijipihtiye decori ijipihtiyequina Cohācjūre ño peohoro. Sata yeahro.

#### Cristo yequina ijina ihcā curuata ijiaja mari

**4** <sup>1</sup>Sa yegu musare tutuaro yahuaja: Cohācjū tiquiro yequina ijiatinare musare beseetiahye. Sa yena tiquiro beserina ijina tiquiro iji dutiriro saha quehnoana ijiaja musa. Tire musare yahuaja yūhū. Mari puhtorore yūhū yedohori buhiri peresupū ijiaja yūhū. Sa ye musare quehnoana iji dutiaja. <sup>2</sup>“Usā pūrīta masi yūhdūdcāja”, ni tuhotuna ijieracāhña. Apequinare quehnoano mehna yeya usuaro marieno. Musa mehna cjēna musare tiquina ñano yepegūta tiquinare cahñe mehna sa ihña cāhña. <sup>3</sup>Sa yena Espiritu Santo yedohoye mehna quehnoano mehna ihcāno mehna ijiducuya musa. Sa yena cahmequeno marieno ijinata musa. <sup>4</sup>Ihcā pagū yero saha ihcā curua ijiaja mari. Sa yero Espiritu Santo ihcāquirola ijire. Cohācjū tiquiro yequina ijianajare musare beseetiahye musare yūhdūoro taro. Sa yena tiquiro yūhdūoatire masine musa. Ti musa masidi ihcānota ijire. <sup>5</sup>Mari puhtoro Cristo ihcāquirola ijire. Tiquiro buheye gūhū ihcānota ijire. Tiquiro yequinare wame yeye gūhū ihcānota ijire. <sup>6</sup>Sa yero Cohācjū ihcāquirola ijire. Tiquiro ijipihtiyequina Pacūro ijire. Sa yero mari puhtoro ijire. Sa yero ijipihtinare marine yedohore tiquiro. Ijipiltina mari mehna ijire tiquiro. Sa yero ijipiltiropū ijire tiquiro.

<sup>7</sup>Ihcā curua mari ijiepegūta ijipiltina marine mari ye masiatire cūri Cristo. Tiquiro cūriro sahata ye masiaja mari. Tiquiro marine sa cūno apee borore tiquiro sa oho cāriro saha yero nidi tiquiro. <sup>8</sup>Sata nine Cohācjū yere tiquina ojoari pūpū: Cohācjūre ihña tuhtiyequinare tiquiro yūhdūdcari bato tiquiro pari turi mūjaa waharota. Sa mūjano tiquiro peye sa oho cānota masare, ni ojoahye panopūre.

<sup>9</sup>“Tiquiro pari turi m̄jaa waharota”, tiquiro nigũ coã warore tiquiro dijia tari gũhure mari masiaja. Ahri yehpapure tiquiro dijia tarire mari masiaja. <sup>10</sup>Sa yero ohõp̄ure dijia tariquiro tiquirota ijire m̄jaa wahariquiro. Ijipihtiye bui m̄jaa wahari tiquiro, ijipihtirop̄u ijiro taro. <sup>11</sup>Tiquiro ijire “Masare peye sa oho cãriquiro”, tiquina nidiquiro. Masare tiquiro sa oho cãno saha tiquiro peye tiquina ye masiatire cūri masare.

Ohõ saha cūri tiquiro: Ihquẽquinare Cristo ye buheyere buheatiquinare cūri. Apequinare Cohãcjũ yere yahu m̄htatiquinare cūri. Quehnoañe buheyere buhe tiniatiquinare apequinare cūri. Cristo yequina cahmecoañequina p̄htoa ijiatiquinare, quehnoano buheatiquinare cūri apequinare.

<sup>12</sup>Sa dihita cūri marine apequinare tiquiro yequinare mari yedohoatire. Sa cūri marine tiquiro yequinare tiquirore mari wacũ tutua nemoatire, tutuana mari wahatire. <sup>13</sup>Sa yena mari ijipihtina quehnoano mehna ihcãno mehna ijinata. Sata ijiro cahmene marine Cristore wacũ tutuana ijina. Sa yena mari ijipihtina Cohãcjũ macunore quehnoano masinata. Sa yena Cristo tutuariquiro, quehnoano masiniquiro tiquiro ijiriro saha mari gũhũ quehnoano masina wahanata.

<sup>14</sup>Mari sa wahana macanagã yero saha ijisi mari. Macanagã quehnoano tũho masiedariaga. Apequina tiquina buhegũ “Ahri poto ijire”, ni tiquina ni meho buhegũ macanagã yero saha ijiyequina apeye buheyere tũho, beseducure. Sa ye apequina tiquina sijoro saha buhegũ ti buheye pehere cahmene. Tiquina yero saha ijisi mari.

<sup>15</sup>Ohõ saha yenatja mari: Mari mehna cjẽnare cahme cahĩna, poto quehnoañe buheyere yahunatja tiquinare. Sa yena macanagã tiquina bucua tũho masiñequina tiquina wahariro saha mari gũhũ tutuana, Cohãcjũ yere quehnoano masina wahanatja. Cristo ijiro saha wahanata.

Tiquiro ijire mari dapu. <sup>16</sup>Tiquiro yequina ijina tiquiro pagũ yero saha ihcã curuata ijiaja mari. Sa yena mari caperi, mari cahmo, mari dahpocãri ihcã pagũp̄u ti quehnoano ijiro saha mari gũhũ peyequina ijiepenata ihcãno mehna quehnoano ijiaja. Mari sa ihcãno mehna mari ijiatire Cristo yedohore. Mari omocari mari pagure ti quehnoano yedohoro saha mari quehnoano yedohoaja apequinare Cristo yequinare. Sa yena mari mehna cjẽnare Cristo yequinare quehnoano cahĩna, tiquinare quehnoano yedohona, tutuana Cristore wacũ tutua nemonã wahanata mari.

**Cristo yequina wahana mari ñañe yeyere duhu,  
quehnoañe pehere comesaja mari**

<sup>17</sup>Sa ye mari p̄hthora Cristo tiquiro dutiro mehna ohõ saha niitja m̄sare: Cohãcjũre cahmeeñequina waro yero saha yeraçãhña m̄sa. Tiquina tũhotuye pehe ñañe dihita ijire. Sa ye tiquina tũhotuye dũhseati ijierare. <sup>18</sup>Sa yero Satana Cohãcjũ yere tiquinare tũhoeragũ yere. Sa ye tiquiro yere ne tũhoerare. Tũho

duerare tiquina. Sa ye Cohãcjũ tiquiro quehnoano iji dutiriro saha ijjerare tiquina. <sup>19</sup>Sa ye tiquina ñano yeye ne bue tiera yuhduare. Ne bujua witierare. Ñañene tiquina tutuaro cahmeñe dihitare yeducure. Ijipihtiye ti ñañene yeducuye duhu duerare. <sup>20-21</sup>Musa pehe poto tiquiro yere tuhona musa ijigũ, Jesu yere quehnoano masina musa ijigũ musa pehere tiquina yero saha ye dutierare tiquiro. <sup>22</sup>Sa yena panopũ musa yerire duhu cãhña. Ti pjere ñañene yeducuna musa ijigũ ti ñañe pehe musare dojomehnenno nimesi. “Ñañene yena, quehnoano bucuenata”, ni tuhutuna ijepenata ne bucuerrari musa. <sup>23</sup>Sa ye musa tuhutuyere quehnoañe pehere comesaro cahmene musare. <sup>24</sup>Panopũ musa ñañe yerire duhu cãhña. Sa yena quehnoañe pehere comesarina ijiya musa. Ohõ saha ijiyequina Cohãcjũ yero saha ijire. Musa sa ijina, quehnoañene yeducunata. Sa yena ñañene yabinata musa.

<sup>25</sup>Sa yena musa ni mehorire duhu cãhña. Musa mehna cjẽnare poto yahuya, ni mehono marieno. Mari ihcã pagũ yero saha ihcã curua cjãnata ijina njaja. Sa yena musa basi ni mehoedacãhña.

<sup>26</sup>Apequinare usuana, tiquinare ñano yeracãhña. Sa yena usuana, ne yoari pje usuaducueracãhña musa. <sup>27</sup>Yoari pje usuana, watĩno tiquiro cahmeno saha yena niaga musa. Sa yeracãhña.

<sup>28</sup>Ihquẽquina musa mehna cjãna Jesu yequina musa ijiato pano yaquerina ijina parĩ turi yaqueracãhña. Sa yena yojopũre quehnoano dahraya pejecuoyequinare musa ohoatire.

<sup>29</sup>Ne ñano yahuducueracãhña. Quehnoañene yahuducuna apequinare yedohore musa. Sa yena quehnoañe dihitare yahuducuya. <sup>30</sup>Ñañene yena Espĩritu Santore bujua witiigũ yena niaga musa. Sa yeracãhña. Yojopũre pihitiri deco pano Cristo marine tiquiro neato pano Espĩritu Santo marine ihña ihbore marine ñañene ye dutieraro. Sa yero Cristo yequina mari ijiyere masigũ yere tiquiro marine. Sa yena tiquirore bujua witiigũ yeracãhña.

<sup>31</sup>Sa yena ne ñano ye nemoedacãhña. Usua, cahme duse tutua nemoedacãhña. Apequinare ñano ni sañuducu nemoedacãhña. Apequinare quiti dahre nemoedacãhña. Ne apequinare ñano ni tuhutu nemoedacãhña. <sup>32</sup>Sa ye musa mehna cjẽnare quehnoano mehna quehnoano yeya. Cristo yequina musa ijigũ ihñano musa ñañene bo cãhri Cohãcjũ. Ohõ saha apequina musare tiquina ñano yegũ ihñana tiquina ñañene bo cãhña musa gũhũ.

**“Cohãcjũ pohnene ohõ saha ijiro cahmene”, ni yahuahye Pablo**

**5** <sup>1</sup>Sa ye Cohãcjũ pohna tiquiro cahñona ijina Cohãcjũre ihña cũña musa. <sup>2</sup>Sa yena apequinare sa cahĩducuya. Cristo marine cahño, mari ñañe buhiri yariahye. Sa yariaro Cohãcjũre bucuegũ yeahye tiquiro. Sa yena marine tiquiro cahĩdiro saha musa gũhũ apequinare cahña.

<sup>3</sup>Sa yena Cohãcjũ yequina ijina ne numia mehna ñano yeracãhña. Numia gũhũ umua mehna ñano yeracãhña. Apeye ñañene ohõ saha ijiye ñañene yeracãhña. Apee borore cahme yuhdueracãhña. Ne sa yeraro cahmene



mūsare Cohācjū yequina ijina. <sup>4</sup>Sa yena buoyere cahme yahuducueraro cahmene mūsare. Tūho masieñequina yero saha yahuducueraro cahmene mūsare. Sa yena ñano ni bujuperaro cahmene mūsare. Ahri pehere yero cahmene mūsare. Cohācjū mehna yahuducuro cahmene mūsare. Sa yahuducuna tiquirore “Quehnoano yeri mūhū ũsāre”, nino cahmene. <sup>5</sup>Apee borore cahme yūhdūana, “Cohācjū ijire”, mari niñe queoyere mari cahmeno saha yena niaja mari tire. Doeri cjēne ño peoyequina yero saha yena niaja mari. Sa ye wūana tiyequina, ñañe dihitare tūhotuyequina, apee borore cahme yūhdūayequina Cohācjū, Cristo mehna tiquina pūhtoro ijiropū ne wahasi tiquina. Tire quehnoano masiaja mari. <sup>6</sup>Ohō saha yeyequina tiquina yeri buhiri buhiri dahrerota Cohācjū tiquirore yūhdūdcayequinare. Sa yena apequina mūsare “Ahri ñañe ijierare”, tiquina ni mehogū tūhoeracāhña. <sup>7</sup>Sa yena ohō saha ñano ye yūhdūdcayequinare ne piti tieracāhña.

<sup>8</sup>Cristo yequina mūsa ijiato pano sa ijirinata ijimedi mūsa gūhū. Yojobū pehere tiquiro yequina ijina, Cohācjūre quehnoano masine mūsa. Cohācjū yequina quehnoañene yere. Sa yena sa yero cahmene mūsare. <sup>9</sup>Sa yena Cristo yequina ijina quehnoañene, Cohācjū cahmeñene, ni mehono marieno yeducunata mūsa. <sup>10</sup>Quehnoañene mari yegū ihñano mari pūhtoro Cristo bucuere. Sa yena tire yeya. <sup>11</sup>Cristore cahmeeñequina ñañe tiquina yeye ñañe waro ijire. Sa yena tiquina yero saha mūsa pehe yeracāhña. Quehnoañe buheyere Cristo yere yahuya tiquinare. Sa yena tiquina ñañe yeyere tiquinare masigū yeya. <sup>12</sup>Masa ihñenopū tiquina ñano ye cohtere. Tiquina sa yerire yahuducuna mari bue tiboaga. Sa yeye ña yūhdūaro yere tiquina. <sup>13</sup>Sa yena tiquinare quehnoañe buheyere mari yahuna, ña yūhdūayequina tiquina ijiyere masigū yena niaja mari tiquinare. Ijipihtiye mari yerire marine masigū yere quehnoañe buheye, buhrioro marine ti ihña masigū yero sahata. <sup>14</sup>Ti ijirota ijire. Sa ye ohō saha ni yahure Cohācjū yere yahuyequina:

Ne, yūhūre tūho duena, tūhoya mūsa. Mūsa ñañe yeyere bujūa witi, tire duhuya. Cristo mūsa ñañe yeyere masigū yerota, ni yahure.

<sup>15</sup>Sa yena decoripe quehnoano yeya mūsa. Tūho masieñequina yero saha ijieracāhña. Tūho masina ijiya. <sup>16</sup>Yojobū cjēna masa ña yūhdūaro yeducure. Sa yena mūsa pehe quehnoañene, Cristo yere sa yeducuya mūsa. <sup>17</sup>Sa yena tūho masiena ijieracāhña. Cohācjū cahmeñene quehnoano masiña. Sa yena tire yeya. <sup>18</sup>Sa ye pairure sihni queheracāhña. Queheyequinare ñano yūhdūro cua yūhdūare. Sa yena pairure tutuaro cahmedacāhña. Espíritu Santo pehere tutuaro cahmeña mūsa mehna tiquiro quehnoano ijiatire. Tiquirore quehnoano yūhtiya. <sup>19</sup>Sa yena mūsa basi Cohācjūre ño peo basayere cahme yahuducuya. Sa yena Salmore Cohācjū yere basayere, apeye tiquirore ño peo basaye gūhūre tiquirore basa peoya mūsa. Quehnoano wacū ño peoye mehna basa peoya. Sa yena mari pūhtoro Cristore ño peoya. <sup>20</sup>Cohācjū mari Pacū ijipihtiyere mūsare tiquiro ohorire bucue “Quehnoare”, sa niducuya mūsa tiquirore. Mari pūhtoro Jesucristo yequina ijina mari Pacūre “Quehnoare”, sa niducuya mūsa.

“Musa ihcã wuhũ cãana Jesu yequina ijina, ohõ saha yeya”, ni yahuahye Pablo

<sup>21</sup> Sa ye musa mehna cãnare cahme ño peoye mehna yuhtiya. Sa cahme ño peo yuhtina Cristo gũhure ño peona nine musa.

<sup>22</sup> Musa namosãnumiare yahutja yojopure. Mari puhtoro Cristore mari yuhtiro saha musa manusũmũare quehnoano mehna yuhtina numia ijia. <sup>23</sup> Jesucristo marine yuhũore tiquiro ya curua cãana mari ijiatire. Sa yero mari tiquiro ya curua cãana mari puhtoro tiquiro ijiro saha musa manusũmũa musa namosãnumia puhtoã ijire. <sup>24</sup> Sa yena Cristo yequina ijina tiquiore sa yuhtiducuaja mari. Sata musa namosãnumia musa manusũmũare quehnoano yuhtiducuna numia ijia.

<sup>25</sup> Musa manusũmũa pehere yahutja yojopure. Cristo marine tiquiro yequinare cahĩno, mari ye ijiatire yariahye. Sa yena marine tiquiro cahĩdiro saha musa gũhu musa namosãnumiare quehnoano cahĩducuya. <sup>26</sup> Cristo mari ye ijiatire yariahye mari ñaũe yerire cosero taro. Tiquiro buheye quehnoaũe buheye mehna mari ñaũe yeyere cosere. Sa yero tiquiro yequina mari ijigũ ihũano aco mehna marine wame yere. <sup>27</sup> Sa cosere marine tiquiro yequina ijanare yero taro. Tiquiro sa cosegũ ne ñaũe buhiri mariena ijinata, tiquiro ihũagũ. Sa yena quehnoana, Cristo yero saha ijinata. <sup>28</sup> Musa namosãnumiare cahĩna, musa basi musa pagurire musa cahĩno saha tiquina numiare cahĩna. Mari namonore cahĩna mari pagure cahĩna niaja.

<sup>29-30</sup> Ne mari pagurire ñano wahagũ cahmedaja. Mari ihyayere ihyana quehnoano yena niaja mari pagurire. Cristo yequina ijina tiquiro pagu yero saha tiquiro ya curua cãana ijiaja mari. Sa yero marine quehnoano yere tiquiro. Sa yena Cristo marine tiquiro quehnoano yeriro sahata mari gũhu mari pagure quehnoano yeaja. Mari namosãnumia gũhure sata quehnoano yero cahmene marine. <sup>31</sup> Sata nine Cohãcjũ yere tiquina ojoari pũpũ: “Sa ye mũano tiquiro pacũsũmũare wijiario tiquiro namono mehna ijirota. Sa ye tiquina pũaro ijiepetã ihcãquiro yero saha ijietã”, ni ojoahye panopũ. <sup>32</sup> Ahri tiquiro ojoarire apequina quehnoano tuhoerari jiri. Sa yegu tire ohõ saha ni yahutja musare. Ohõ saha ni yahuro niaga. “Cristo tiquiro yequina mehna ihcã pagu yero saha ihcã curuata ijire”, ni yahuro niaga. <sup>33</sup> Sa yegu musare ohõ saha ni yahu nemoutja tja: Musa pagurire musa cahĩno saha musa namosãnumiare cahĩna. Sa yena musa manusũmũare quehnoano ño peoya musa.

**6** <sup>1</sup> Yojopure macanagãre yahutja. Mari puhtoro Cristo yequina ijina musa pacũsũmũare quehnoano yuhtiya. Musa sa yegũ quehnoarĩne. <sup>2-3</sup> Ohõ saha niahye Cohãcjũ dutiye: “Musa pacũsũmũare quehnoano ño peoya”, ni dutiahye tiquiro. Ahri dutiro mehna Cohãcjũ yahu nemoahye. Ohõ saha niahye: “Musa pacũsũmũare ño peona, ahri yehpapũ yoari pje bucueye mehna ijinata musa”, ni yahuahye. Tiquiro sa ni yahugũ ahri dutiro ihyo ijiri dutiro ijierare. Sa yena tiquiro nidiro saha musa pacũsũmũare ño peoya.

<sup>4</sup> Yojopure tiquina pacũsũmũare yahutja: Musa pohnare sa tuhtiducueracãhã, “Usuagũ yeari”, nina. Mari puhtoro Cristo tiquiro cahĩne mehna tiquiro yedohoye mehna tiquinare quehnoano cohteya. Sa yena tiquinare quehnoano yahuya.

<sup>5</sup>Yojopure cahacjånare musare yahutja: Cua pesaro mehna, ño peoye mehna ahri yehpa cjånare musa puhtoare quehnoano yuhtiya. Ni mehono marieno quehnoano yuhtiya. Cristore musa yuhtiro sahata tiquinare yuhtiya musa.

<sup>6</sup>Tiquina ihñono dihitare yuhtina ijieracãhña. Sa yeyequina masa dihitare tiquinare ihña bucuẽgũ cahmene. Musa pehe Cristo tiquiro cahacjãna musa ijiro saha musa puhtoa gãhure sa yuhtiducuya. Cohãcjũ tiquiro cahmeno sahata quehnoano bucuẽye mehna yuhtiya. <sup>7</sup>Sa yena Cristore yuhtina musa ijiro saha bucuẽye mehna yuhtiya musa puhtoa gãhure. “Masa dihitare yuhtina niaja”, ni tuhouteracãhña. <sup>8</sup>Sa yena ahrire wacũña: Ijipihtina quehnoañene mari yegũ ihñano Cohãcjũ quehnoano yerota marine. Cahacjånare, cahacjẽna ijieyequina gãhure quehnoano yerota.

<sup>9</sup>Yojopure puhtoare yahutja: Musa cahacjånare quehnoano yeya. Tiquinare quehnoano yũhũ ye dutiriro sahata yeya musa gãhũ tiquinare. Tiquinare tuhtiperacãhña. Uhmuse cjũno Cohãcjũ potota tiquina puhtoro ijire. Musa yaquiro puhtoro ijire tiquiro gãhũ. Sa yena ijipihtina musa tiquiro cahacjãna dihita ijire. Sa yero tiquiro ihcãno saha ihñare musare ijipihtinare. Sa yena musa cahacjånare tuhtiperacãhña.

### **Cristo yequina watĩnore tiquina cahmotarire yahuahye Pablo**

<sup>10</sup>Ahrire yahu bato tiitja musare: Quehnoano wacũ tutuana ijiya musa. Mari puhtoro Cristo musa mehna ijire. Sa yena tiquiro ye masiñe mehna wacũ tutuana ijiya. <sup>11</sup>Watĩno marine ni mehono, ñano ye dutire marine. Cohãcjũ marine cahmotare mari ñañene yeborire. Marine tiquiro cahmotayẽ surara tiquiro cahmotari suhtiro, come suhtiro yero saha ijire. Sa yena ti suhtirore musa sañano saha Cohãcjũ tiquiro cahmotayere quehnoano cõo pehoya. <sup>12</sup>Jesu yequina mari ijigũ, marine ihña tuhtieyequina masa waro ijierare. Uhmuse cjẽna ijimediquina ñañequina, tutuayequina, tiquina pehe ijire marine ihña tuhtieyequina. Watĩa ahri yehpa cjẽna puhtoa ijire. Sa ye tiquina gãhũ ijire marine Jesu yequinare ihña tuhtieyequina.

<sup>13</sup>Sa yena yojopure cahmotari suhtirore musa sañano saha Cohãcjũ musare tiquiro cahmotatire tiquiro yere quehnoano cõo pehoya. Sa yena watĩno musare tiquiro ñano ye dutigũ, musare tiquiro ñano ye duagũ, tiquirore cahmotanata. Sa yena yũhdũducãnata. Sa tiquirore yũhdũducãna, tutuana tojoanata musa.

<sup>14</sup>Sa yena tutuana ijiya. Cohãcjũ musare tiquiro cahmotatire ohõ saha yeya musa:

Surara tiquiro come suhtiro mehna tiquiro jeripohnare cahmotariro saha poto yahuyere Cohãcjũ yere quehnoano tuhoya musa watĩnore musa cahmotatire. Sa yena Cristo yedohoye mehna quehnoana ijiya musa, watĩnore musa quehnoano cahmotatire.

<sup>15</sup>Surara tiquiro dahpo suhti mehna tiquiro dahpocãrine tiquiro cahmotariro saha quehnoañe buheyere quehnoano masiña musa, watĩnore musa cahmotatire. Ti buheye marine quehnoano ijigũ yere.

<sup>16</sup>Surara tiqiro tohoriro mehna tiqiro cahmotariro saha Cristore quehnoano wacū tutuaducuya mūsa watīnore mūsa cahmotatire. Bueye cju mehna tiqiro sihā mūsare tiqiro buedoqueboro saha watīno mūsare ñano yegū ye duare. Sa yena Cristore quehnoano wacū tuana, cahmotanata mūsa.

<sup>17</sup>Surara tiqiro come sapea mehna tiqiro dapure cahmotariro saha mūsare pecapū wahaborinare Cristo yuhduorina ijiya mūsa, watīnore mūsa cahmotatire.

Surara tiqiro ñoseni pjī mehna tiqiro cahmotariro saha Cohācjū ye buheyere quehnoano masiña mūsa, quehnoano mūsa cahmotatire. Sa yena apequinare quehnoano yahuya tiqiro yere. Ti Cohācjū ye buheyere Espíritu Santo marine yahure.

<sup>18</sup>Sa mūsa watīnore cahmotana Cohācjūre decoripe sa siniducuya. Espíritu Santo yedohoye mehna sa siniducuya. Sa yena quehnoano wacū masiña. Sa sinina, caributieracāhña. Ijipihtiequina Cohācjū yequinare sa sini basaducuya.

<sup>19</sup>Sa yena yuhū gūhūre sini basaya Cohācjūre. Ohō saha ni sini basaya: Quehnoañe buheyere, panopū tiquina masiedarire quehnoano yuhū yahuatire sini basaya yuhūre. Sa yena cuero marieno yuhū yahuatire sini basaya yuhūre. <sup>20</sup>Cristo tiqiro yere yahu dutiro yuhūre ohori. Yuhū sa yahuri buhiri peresupū ijiaja yojopūre. Ohōpū yuhū ijiepegūta cuero marieno tiqiro yere yuhū yahuatire sini basaya yuhūre. Tiquiro yere yahuacjū ijigūta niaja yuhū.

#### **Pablo quehnoa duti bato tiahye**

<sup>21</sup>Yojopūre Tíquico mūsa cahapū esaro yuhū ijiye tiyere mūsare yahu pehorota. Tiquiro mari acayuro mari cahñiquiro ijire. Sa yero mari pūhtoro yere quehnoano yedohoriquiro sa iiducure. <sup>22</sup>Usā ijiye tiyere mūsare yahu dutigū tiquirore ohogū niaja mūsa quehnoano bucueatire.

<sup>23</sup>Cohācjū mari Pacū mari pūhtoro Jesucristo gūhū tiquina mehna mūsa ijipihtinare usā acayere quehnoa dutiaja. Cristore mūsa quehnoano wacū tutuaye mehna mūsa cahme cahīatire Cohācjūre sini basaja mūsare. <sup>24</sup>Ijipihtiequina mari pūhtoro Jesucristore sa cahīducyequinare Cohācjū mehna quehnoa dutiaja.